

•sanjvwnz•

Damq Vuengzcanghfwen

拜访歌王

□ Luz Vanjinh / 陆婉珍

Yoz Gensiu dwg boux canghfwen ak ndeu, youq Sangsw h Yen mbouj miz bouxlawz mbouj roxnaj de.

Yoz Gensiu dwg ciuh daih seiq boux cienziep vwnzva canghfwen Bouxcuengh Sangsw h Yen. Dwen daengz de, boubboux cungj haenh.

Vihneix, gou gig siengj bae damq boux canghfwen bonjdieg mizmingz neix, dingq de eu fwen baez ndeu, gangjgangj goj.

Gou caeux couh dingqgangj canghfwen Yoz Gensiu daj iq couh maij eu fwen, bingzseiz haibak couh baenz fwen, lij bae camgya Doxdax Gvangjsih Canghfwen Bouxcuengh gvaq, ndaej “Vuengzcanghfwen” dem.

Haujlai saeh cungj dwg baenzneix, dajsuenq ganj mbouj hwnj bienqvaq, moix baez siengj hwnjdin okbae, cungj miz saeh saepsoiq rag dawz, geijlai baez mbouj ndaej saedyienh aen siengjmuengh neix.

Ngoenzhaenx dwg ngoenzsinghgiz, banhaet, baengzyoux dwk denva hawj gou, naeuz miz gicej daj diegwng dauj caijfangj canghfwen Yoz Gensiu, de couh iu gou caez bae. Gou baez dingq couh angqvauvau saet hwnjdaeu. Cagaenj seizbient gaem geu buhboemz he daenj hwnj ndang, yet hwnj aen ci baengzyoux, cungfofo coh ranz canghfwen Yoz Gensiu bae lo.

Seizdoeng, ngoenzneix youh doek fwnraengraemz. Gij fwn iq lumj lwgnyez maenz nei, seiz mbouj seiz riengz rumz mbin ndonj haeuj ndaw rungj dauj, hawj gou saenzdiengdieng. Hoeng baez dingq daengz ranz Yoz Gensiu lauxsae mbouj gyae geijlai, sim gou youh ndatfwdfwd hwnjdaeu lo.

“Docih gyoengq lingjdauj,
Eu fwen bauj sou ndei,
Hoh sou cungj swnhleih,
Bibi ndaej hwnj hung.

Bouxgeq ndaej gyaeu nanz,
Lwglan miz fukheiq,
Coengmingz youh lingzleih,
Bae dayoz doegsaw.”

Ci hai daengz bakgvaengh, lij caengz raen canghfwen, couh dingq daengz gij sing fwen goksasa——Laxlawz dwg Yoz Gensiu lauxsae eu

fwen coux hek ne.

Siengj mbouj daengz, gou baez daih’it dauj baenz vaiq couh ndaej dingq de eu fwen lo. Caj dou byaij haeuj ndaw gvaengh bae, gou doeksat lo, ranz de cang ndaej gyaqciq dangqmaz, hawj vunz yawj ndaej ronghsag lwenqda!

Yoz Gensiu lauxsae yawj dauj miz roekcib lai bi, cingsaenz gvaekgvaek. De ndwn youq bakdou ranzmbwk riunyumnyum vih dou eu fwen. Gou dauqdaej youq ngoenzneix ndaej caeuq “Vuengzcanghfwen” doxaen lo!

Dou haeuj ndawranz, Yoz Gensiu lauxsae couh eu gij fwen hawj de ndaej “Vuengzcanghfwen” hawj dou dingq.

De naeuz, gaej yawjsiuq geij hot fwen dinjdtdet neix, ndawde hamz miz haujlai eiqsei laeg. Fwen de mboujdan gangj daengz gij saeh iq lwgminz haemzhøj caeuq vuenyungz, vanzlij danq gajgwz hailangh dauj, Bouxcuengh raeuz saedceij bienqvaq hungmbwk, caemhcai haenh guek raeuz miz Cunghgoz Gungcanjdangj lingjdauj, yied dauj yied fouqgiengz, hawj vunz baez dingq, sikhaek mingzbeq guek raeuz gij cwngcwz ndei. Gvaiq mbouj ndaej de dwg “Vuengzcanghfwen” ha!

Eu sat le, Yoz lauxsae muengh aen mauh “Vuengzcanghfwen” caeuq mbaw cwngsuh, riunyumnyum gig miznaj naeuz: “Yienznaeuz gou eu fwen baenz buenq seiq, youq ndaw yienh ndaw si gaeng aeu ndaej haujlai ciengj, hoeng, hix siengj mbouj daengz laux goenggeq baenzneix le, lij youq aen doxdax daengx swcigih ndawde ceng ndaej aen mingzdaeuz baenzhung……”

“Vunz laux lumj faexnduk, mboengqhaenx ndangdaej gou mbouj ndei, bae doxdax geij ngoenz gaxgonq lij guh soujsuz dem……” De youh naeuz.

Dwg ha, youq rangh dieg neix, de eu fwen cei maenh, ndaej “Vuengzcanghfwen” cingqcaen mbouj gyaj. De daj iq couh gyaez eu fwen, majhung le, de engq simmaez eu fwen. De yawj daengz maz cungj sikhaek haibak guh ndaej fwen. Danghnaeuz mwngz hawj

de aen cawjdae he, de swnhbak couh eu ndaej ok, vanzlij dawzyinx ndeidingq, hamzeiq laegdaeuz.

Byaij haeuj ndaw ranzaw cau h fwen de, baihna couhdwg aen gaqsaw cang rim saw fwen de. Ndwade miz haujlai fwen gaeng fatbiuj, roxnaeuz oksaw, lij miz haujlai fwen moq ngamq cau yungh bit sij. Youq henz gaqsaw lij miz gaiq hwzbanj iq he laeb dwk, de ciengz laemzseiz youq gwnzde sij fwen. Ndw ranzaw neix, byaij daengz gizlawz cungj miz gij ngaeuz fwen.

Guh fwen, eu fwen hawj de yinxdaeuz dangqmaz, hix hawj de ndaej daengz haujlai mingzdaeuz. Ndwade, bi 2018, youq doxdax ndaej “Vuengzcanghfwen” aen mingzdaeuz, doiq de dauj gangj cei daegbied, neix mboujdan dwg haengjdingh gij naengzlig caeuq suiibingz sikhaek guh fwen de, vanzlij dwg gienh saeh mbouj bingzciengz ndeu, hawj de ndaej gikdoengh dangqmaz.

“Cadi dangqnaj loekgvaq bw!” Baez dwen daengz aen doxdax neix, Yoz Gensiu lauxsae sikhaek gig miz yinxdaeuz, daj gyaeuz daengz byai lwnh hawj dou dingq——

“Bi 2018 ndwen 10 ngoenz 23, aen doxdax neix youq Liujcouh Si Sanhgyangh Duncuz Swciyen guh, dwg vih angqhoh swcigih laebbaenz 60 hopbi gawjbanh. Gou ngoenz 19 ndaej iu bae, mwhde ndangdaej gou mbouj ndei, lij youq yihyen Namzningz yw bingh.

Ciep ndaej dunghcih le, gou couh ninz mbouj ndaek, naengh mbouj onj lo. Gou ciuh vunz neix couh gyaez eu fwen, itdingh aeu bae camgya aen doxdax! Hoeng, vunzranz boubboux cungj ndaq gou, vih eu fwen mbouj aeu mingh, mbouj rox dailix……

Gou caegcaeg bae cam canghyw, gou seizlawz cij ndaej ok yen ne? Ndaej ‘cingigyaj’ ngoenz saek song ngoenz lwi……”

Doeklaeng, de rox ndangdae ca mbouj geijlai ndei seiz, caen heuh canghyw hai geij ngoenz yw le, couh caeuq vunzranz doxdingj doxceng, naeuz dai hix yaek dai youq aen daiz fwen! Vunzranz mbouj miz banhfap, cij ndei caih de bae camgya ciengz doxdax eu fwen neix lo.

Doxdax seiz, de swnhleih ndaej haeuj doxdax cei laeng. De saenqsim rim aek hwnj daiz eu fwen, eu le couh youq lajdaiz angqvauvau caj. Hoeng cungj ndaejnyi gij coh caeuq cingzcik bouxwnq ndwi, caj haujlai nanz cungj mbouj ndaejnyi faenh swngeij, miz di doeknaiq lo. De gag siengj: Baezneix ndang nyieg, cinglig mbouj gaeuz, aiq mbouj wnggai dauj camgya ciengz doxdax ba! Aenvih eu fwen le de roxnyinh caen miz di baeg.

Mwh de naiqnuknuk riengz gyoengqvunz bae gwn ngaiz seiz, sawqmwh ndaejnyi bouxcujciz naeuz: “Gij cingzcik Canghfwen Yoz Gensiu Dui Fangzcwnzg gangj Si haxbaenh gyoepsuenq miz loek, cingj mwngz caiq daengz daiz cujsiz dauj gip gaeu, gip daengz maz couh ei gij neiyungz eu fwen, gak boux bingzveij dangciengz bingz faen hawj mwngz.”

Dingq daengz neix, Yoz Gensiu lauxsae doeksat youh vuenheij, engq simgaenj lo. Neix dwg aen gihvei moq, mbouj rox bonjfaenh gaem ndaej mbouj ndaej.

De gip aen gaeu hwnjdaeu hawj bouxcujciz, bouxcujciz couh sikhaek naeuz: “Canghfwen Yoz Gensiu gip ndaej aen cawjdae dwg ‘Dauqngex Ngoenz Gaxgonq’, cingj mwngz youq ndaw faen cung ndeu aeu eu fwen gij neiyungz neix.”

Yoz Gensiu lauxsae baez dingq couh sim’ angq ndaej naj ronghsag lo, haibak couh eu:

“Dauqngex ngoenz gaxgonq,
Haeux donq mbouj miz gwn,
Gajgwz lumj rumzcin,
Hwnzngoenz cien hauej daeh.”

Siengj mbouj daengz, sing fwen ngamq roengz, gak boux bingzveij caeuq gyoengq bouxyawj cungj bekfwngz bububub. Lij miz boux bingzveij he haenh naeuz: “O, deng lo, fwen neix dangciengz eu ok bak, doedok cawjdae, sengdoengh baenzlai, ei qsei youh laeg, caen dwg fwen ndei bw!”

Couh yienghneix, aen mingzdaeuz “Vuengzcanghfwen” couhdwg duh de lo.

Gou doq dingq boux “Vuengzcanghfwen” neix lwnh, doq roxnyinh dangqnaj boux ndang iq neix yied dauj yied hungsang lo.